

Las «Punts» cun il tema «Get-Together»

■ **Esser en cumpagnia è fitg important per l'uman, per sia olma e per esser cuntent. L'ediziun actuala da «Punts» tracta quest tema, cunzunt il project Get-Together – Inscunter da las linguas» che ha gi lieu durant la stad.** L'intent dal project era da laschar s'inscuntrar persunas da tut las regions linguisticas. Sutvart insaquantas parts da divers texts.

Final fulminant da Get-Together

Jasmin Epp rapporta dal project Get-Together che ha gi lieu la stad passada. Dumengia, ils 15 d'avust ha la gronda festa finala da Get-Together – Inscunter da las linguas gi lieu a Berna. Suentar esser chaminadas sur 400 kilometers èn las duas gruppas s'entupadas sin la piazza federala per festivar cun in program multifar sco il viadi sez.

Ils 12 da fanadur èn duas gruppas partidas da Münstair respectivamain da Chancy per traversar las quatter regions linguisticas ed uschia persequitar il feno-

men da la quadrilinguitad en Svizra. Suentar insaquantas etappas sur vias e pradas, cundiziuns d'aura malempernaivlas e vaschias dolurusas èn las gruppas s'entupadas ad Engelberg per passentar comunablamain las davosas etappas enfin a Berna. Arrivadas là ha il project cuntanschì il punct culminant: La festa finala sut tschiel avert. Ils giuvens participants sco era bleras persunas interessadas èn vegnids divertids cun differents producziuns, workshops e stans da mangiar che han anc ina giada represententà la diversità linguistica e culturala da la Svizra.

Cumpagnia al «Rock am Ring»

Noe Tschanner descriva l'esser da cumpagnia en cumbinaziun cun la musica. Vegnir ensemen per far in pau festa u giudair in per concerts interessants en cumpagnia. En Svizra datti insaquantas open airs, uschia ch'ins ha la chaschun dad ir prest mintga fin d'emna x-insanua ad in open air.

In team, in spiert

Floriana Sonder s'occupa da la cuminanza sportiva. Sport da grupp è per mai il meglier exempel da tegnair ensemen. En ina grupp dastga esser fitg differenta glieud che na conuscha betg bain in l'auter, ma tuttina èn tuts reunids in cun l'auter. Jau discurr en quest cas dal ballape. En in sport d'equipa na vai betg da tralaschar ina giada in trenament u in gieu, perquai ch'ins n'ha nagin gust u sa senta per il mument betg gist lasuenter, pertge ina squadra è dependenta da mintga singul giugader.

Tgi che n'ha (anc) betg abunà las «Punts» e vul exnum leger questa ediziun, duai dumandar per in exemplar d'emprova cun contactar la redacziun: Sriver a suprastanza@punts.ch ubain contactar il secretariat 078 808 35 11. I dat dal reminent era l'abunament d'emprova da las «Punts» per quels e quellas che na vulan betg cumprar il giat en satg. Abunar pon ins sin www.punts.ch.

La redacziun